

虛空孕菩薩經卷下

第二

隋天竺三藏闍那崛多譯

善男子是名菩薩最初犯於第一大罪是善男子犯是罪已失於一切往昔所造諸善根等違本誓願被煩惱降不得上生亦復不能得涅槃樂徒自虛行於菩薩行忘菩提心後墮惡道善男子是故菩薩欲化衆生先須知心應知其行如其彼行次爲說法譬如有人欲入大海應先知彼水之深淺然後當入乃至略說此虛空孕菩薩摩訶薩爲於彼等諸

衆生輩現生彼國示現身相善能知彼若干衆生犯於重罪畏墮惡道若復有人怖畏罪故或聞他說稱彼虛空孕菩薩名者或復欲樂見彼菩薩而彼菩薩爲欲懺悔深重罪故於後夜時香湯澡浴著淨衣裳燒沉水香多伽羅香右膝著地合掌向東當至心稱彼虛空孕菩薩名號時虛空孕菩薩知彼初發菩提道心人行罪福輕重隨其根性而爲現身或復作於婆羅門身乃至童男童女之身在現前住現前住已爲欲憐愍初發心故觀彼

菩薩本起重業罪過因緣教令懺悔為彼示現甚深善巧微妙方便說於最上大乘法要教今建立三昧忍門諸陀羅尼諸地等法令其解脫一切惡道重罪因緣住不轉地向於阿耨多羅三藐三菩提又得大力猶如金剛成牢固心於六波羅蜜中又得成就阿耨多羅三藐三菩提是虛空孕菩薩或衆生前示現已身現自身已而為說法若虛空孕菩薩未為現於身時時彼初行菩薩大士更於後夜香湯澡浴著淨衣裳燒沉水香求彼東方

黃白大士名阿樓那而口唱言仁阿樓那汝大慈悲欲出現照此閻浮提憐愍我故起慈悲心覆護於我為我諮白虛空孕菩薩令虛空孕菩薩示我方便我今欲懺所有重罪令我於聖大乘之中得大智眼作是勸請禮拜已訖還歸本處安隱睡眠爾時東方黃白大士阿樓那出時虛空孕菩薩即來現身於睡眠寢中在彼犯重菩薩之前示現已身教彼重罪初行菩薩大智方便悔所犯罪或復示現大方便智令彼初發道心菩薩得彼三昧

名無忘失菩提之心安止住於大乘法中速
滿成就六波羅蜜復次善男子或有初行菩
薩見行菩薩行者至其所而告彼言汝不
能行菩薩六波羅蜜亦不能成就阿耨多羅
三藐三菩提汝當發聲聞辟支佛心汝於煩
惱即得解脫乃至如前說善男子是名第二
菩薩犯於重罪復次善男子或有初行菩薩
見他衆生作如是言仁者勿行波羅提木叉
毗尼戒律於是法中勿爲精進汝速發阿耨
多羅三藐三菩提心汝速讀誦大乘經典汝

所作三種諸煩惱行謂身口意因此惡業諸
煩惱故即得清淨乃至如前所說善男子是
名初行菩薩第三犯於重罪復次善男子或
有菩薩見於他人作如是說汝諸人輩捨聲
聞乘莫聽讀誦莫爲他說覆藏勿示汝等善
男子莫示聲聞乘汝若行此聲聞乘者不得
大果不能斷除諸煩惱結汝但說清淨大乘
經典聽誦受持爲他顯說以此因緣汝得度
脫一切惡道得滅一切諸惡等業當速成就
阿耨多羅三藐三菩提彼人若聞初行菩薩

如是言者隨順此行彼等二人皆犯重罪善男子是名第四犯於重罪復次善男子初行菩薩常行兩舌以心口相違凡所讀誦大乘經典求名聞故爲利養故爲得尊重求供養故作如是心讀誦經典爲他解說受持宣通若爲他說方便隨宜於他邊聞復向他說我今身是大乘之人自餘非也發如是等嫉妬之心以利養故或見其餘大乘行者從他人邊所得財寶四事供養以是因緣彼等即便生瞋恨心爲彼菩薩處處流布鄙惡名聞毀

辱罵詈誹謗輕賤稱譽自己以如是等嫉妬心故向於他人說上人法我得上人如是上法我得我知以是因緣是人違於本誓願故被煩惱降皆大乘法彼等衆生於大乘中犯大重罪乃至捨身墮於惡道譬如有人欲採珍寶詣寶洲邊而不入海雖復入海在於中路自破船舶而彼癡人於海水內便取命終善男子如是如是其初行菩薩等發心欲入大乘之海而彼癡人因嫉妬故毀謗妄語以是因緣彼等癡人破信行船破信行已滅智

命根善男子其初行菩薩如是愚癡無智少聞以嫉妬因緣妄語毀他遂犯大罪善男子是名初發心菩薩第五犯大重罪復次善男子有當來世初行菩薩或復俗人出家人等所有甚深空相法門微妙經典以諸陀羅尼諸地諸忍以種種行等而莊嚴之為諸大智諸菩薩等作於勤求苦行境界於大乘經或讀或誦或解說宣揚為他敷演分別廣宣而語他言我自然解如是經典自然證知自然明了唯我一人為汝等故慈悲演說汝從我

聞已如是思惟如是讀誦如是甚深法中自然曉了汝以是因緣當得知見如我今者而不肯言我讀我誦如是甚深微妙經典為汝說也如是之人從其四輩求利養故自賣其身以是因緣一切三世多他阿伽度阿羅訶三藐三佛陀及大菩薩摩訶薩一切諸聖富伽羅所彼諸癡人得波羅夷罪犯彼大重虛妄誑惑一切天人如是癡人亦復無有大乘之分沉入大乘耶況得勝處況復當得成就阿耨多羅三藐三菩提耶譬如有人欲行遠

路至於曠野以飢渴所逼忽值果林便入彼處求食因緣欲活命故而彼之人忽遇大樹華果充足香美成就遇已得味得是味已更上毒樹而服毒果服已命終善男子如是如是愚癡人輩今已獲得人身值善知識依倚知識入於大乘彼等衆生求利養故好自稱譽毀謗他人得如是等犯大重罪犯重罪已爲諸智人之所輕慢當墮惡道以是因緣一切利利婆羅門毗舍首陀不得親近若有諸人親近彼者如是人輩即違一切大智聖人

成大過罪善男子是名初行菩薩犯於第六大重罪也復次善男子當來之世或有刹利諸國王等爲諸惡行婆羅門國師惡行大臣惡行醫師等實是愚癡謂已大智有大才能多受封祿而彼人等修諸施行造衆福業彼諸人輩因少布施修行義故憍慢放逸謂已有道勸刹利王共我弟子諸沙門等互相諍競更相破壞或勸沙門共刹利王更相關諍彼惡人輩依刹利王與比丘罪或稅財物彼諸比丘以刹利王諸大臣等逼迫因緣故或

輸已物或輸僧物或輸招提僧物以是諸物
輸稅供官與彼惡人而彼惡人從諸比丘取
是諸物奉刹利王彼等二人悉皆犯於大重
罪也彼諸刹利及惡人等共諸比丘互相鬪
諍以是因緣捨彼正法建立非法取彼非法
遠離正法捨彼大乘所說經典毗尼戒律優
波提舍摩訶優波提舍遠離慈悲般若波羅
蜜善巧方便及餘經典戒律之行如來所說
莫不棄捨爲欲擾亂諸比丘故虛心橫構違
佛戒律自造法制造法制已擾亂比丘令諸

比丘皆悉遠離奢摩他觀正行正念乃至使
於禪定之者皆生忿恚擾亂之心常恒鬪諍
以是因緣令諸比丘生諸煩惱不得寂定爾
時彼等諸比丘輩失正信法失善比丘威儀
法式令墮諸見以是因緣令諸比丘皆悉懈
怠多事世念不能持戒破戒捨戒不復能依
沙門法則口言我是沙門比丘雖復唱言我
是梵行舉動聲氣猶如貝聲不依正法而說
於法如是之等諸比丘輩及諸眷屬於刹利
王所并諸臣民以輸物故增倍供養如是等

輩諸惡比丘於俗人前說諸有德阿蘭若等
空閑比丘不善之事令彼刹利諸惡臣等并
諸眷屬遂於精進持戒比丘生不善心誹謗
之心於精進比丘所有資財皆悉奪取奪已
轉施誦經比丘彼等二人悉犯重罪何以故
其禪定比丘真實福田如是觀已應令修業
不令彼等知彼僧務而禪定比丘當得三昧
諸陀羅尼諸忍地等當作法器真是福田真
實福器爲世間眼爲彼世間作大光明顯示
善路爲建業地於煩惱田教彼衆生皆令得

度度已建立涅槃之道善男子是名初行菩
薩有八種重罪而不用功捨離二處彼初行
菩薩犯大重罪因緣力故所有往昔作諸善
根皆悉忘失忘失已後墮於惡道違於本誓
被煩惱降失天人樂虛妄迷惑失菩提心善
男子爲如是等諸善男子故此虛空孕菩薩
生彼國中爲彼衆生示現身相或作比丘身
威儀庠序或作婆羅門身顯現威儀具足成
就乃至應以畜生而得化者即現畜生威儀
之相略說乃至如首楞嚴三昧所說當知是

處亦復如是巧知根機種種心器隨應現身
於彼衆生隨順說法教彼種種未曾有法於
一切智之所宣說微妙經典諸陀羅尼諸忍
地等普爲顯現令彼諸惡犯重罪者初行菩
薩教生慙愧令其怖懼悔沒之心懺彼重罪
遠離棄捨永不敢作善男子彼等衆生以犯
重罪恐怖因緣聞是虛空孕菩薩名號欲自
見身者畏墮惡道悔彼罪故是諸衆生應當
頂禮虛空孕菩薩摩訶薩足復應至心稱其
名號時彼虛空孕菩薩摩訶薩隨其根業以

菩薩身相即在現前應以比丘身得度者即
現比丘身相應以婆羅門身度者即現婆羅
門身相應以童男童女身度者即現童男童
女身相應觀彼初行菩薩如所犯重即現如
是如是方便教令懺悔於甚深法無上乘中
顯示善巧方便之行若正地若非正地若諸
三昧若諸陀羅尼若諸忍中示現教行乃至
次第教令建立八正道處以虛空孕菩薩力
故彼等衆生得脫一切諸惡道苦脫惡道已
建立置於不退轉地後得建立必得阿耨多

羅三藐三菩提善男子如是如是彼菩薩等
於六波羅蜜行中大力精勤猶如電光速得
成就阿耨多羅三藐三菩提道善男子若虛
空孕菩薩摩訶薩於犯重罪菩薩前不現身
相者其犯重罪初行菩薩知自罪失故欲請
虛空孕菩薩於後夜時以香湯澡浴著淨衣
裳胡跪合掌向於東面燒沉水香至心勸請
東方黃白阿樓那天子應作是言阿樓那阿
樓那汝有大慈悲有大功德汝初出東方普
照閻浮提以慈悲故願覆護我爲我速疾勸

請虛空孕菩薩具大悲者令彼菩薩特爲我
故於睡眠中顯示巧便以巧方便故教我懺
悔所犯重罪於大聖大乘中速得智眼作是
語已彼重罪初行菩薩還入室中寢卧睡息
爾時東方黃白阿樓那閻浮提顯現之時彼
虛空孕菩薩即隨後來作菩薩身在彼初行
菩薩目前於睡眠中現巧方便教犯罪者懺
悔惡業於初行菩薩前作如是等方便知見
作是方便已其初行菩薩即時得一二昧名
不忘失菩提於大乘中得決定住不可退動

速得成就六波羅蜜不久當證阿耨多羅三藐三菩提善男子此虛空孕菩薩最大勤勞辦最勝事成就勝妙如意摩尼微妙寶珠貫在其頂奇特顯現善男子此虛空孕菩薩有如是等無量無邊不可思議功德之聚復次第九善男子若有衆生聞是虛空孕菩薩名者或作形像以種種供具供是菩薩尊重恭敬禮拜讚歎以種種香華鬘塗香末香燒香以種種幡蓋寶幢供養於彼供養是已復更供養尊重恭敬將自身命付彼菩薩彼等衆生以

是菩薩威神力故火不能燒水不能溺杖不能傷一切國土所不能害於一切處人與非人畢竟不能奪其精氣唯除命盡設有重病不得久停不爲飢逼而取命終不爲縣官橫所觸燒不犯重罪乃至命盡之時眼不覩色耳不聞聲鼻不聞香舌不得味身不得觸唯有微細氣息身中暖氣及微細識猶在未離當是時間虛空孕菩薩爲彼衆生示現已身若有衆生在世之時信婆羅門者是善男子於最後識欲離身時作婆羅門身於前顯現

令生歡欣若有衆生先事魔王者後命盡時
是虛空孕菩薩現魔王身乃至在世事那羅
延天者若大自在天若帝釋天若轉輪聖王
若日月天若提頭賴吒天若毗樓勒迦天毗
樓博叉天若毗沙門天乃至世間種種山神
樹神河神泉井之神如是衆生隨其所有歸
依之者是虛空孕菩薩還作如是如是身相
臨命終時在彼衆前顯現身相隨彼衆生所
有心願皆現與之於前現身現彼身已作如
是言

若人以智慧 能見四諦者 是人煩惱中
即能度彼岸

彼諸衆生以意識知見此法已得生善處若
有衆生應以佛身化者即現佛身在衆生前
說如是言

若於佛智底 第二 能度煩惱海 十 即速證彼智
諸苦得解脫

爾時彼諸衆生以念佛故以聞佛音故心生
歡欣命終已後捨五濁世即生淨土值遇諸
佛聽受正法乃至略說法僧亦爾善男子此

虛空孕菩薩得如是等不可思議功德之法
善男子若復有人於自心中欲取種種三昧
得大自在彼等衆生於後夜時應從卧起以
香湯澡浴燒沉水香隨力隨分以種種供具
供養虛空孕菩薩頂禮足下供養禮拜已於
一切衆生邊當生慈心作如是言虛空孕菩
薩得大慈悲門已得智慧速念我速念我願
常與我正念三昧方便即誦呪曰

多地他一噓慕二囉那棄三博叉尼隸四薩
慕達囉多隸五多那耶那耶六摩訶迦流尼

迦七阿奴波闍婆三勿利帝八阿伽囉闍婆
三勿利帝九拔折囉闍婆三勿利帝十胡噓
舍三勿利帝十一阿那摩三勿利帝十二蒲多俱
致三勿利帝十三莎呵十四

誦此呪已彼菩薩威神力故即得正念入諸

第十二

十一

三昧門若復有人欲誦種種經論或諸佛所
說或聲聞說彼人於後夜時於東方處黃白
現時以香湯澡浴著淨衣裳東面胡跪燒沉
水香隨力所辦供養頂禮虛空孕菩薩於一
切衆生所生慈悲心作如是言虛空孕菩薩

善男子已得一切衆生邊不思議慈悲之心
以大智慧念我念我汝是菩薩最勝富伽羅
與我正念諸勝三昧方便巧妙深大智慧即
誦呪曰

多地他一尼羅涉鞞二紺蒲沙涉鞞三耶婆

那涉鞞四博察薩迷五波吒羅闍駛六薩他

那蘇盧鞞七貫薩多羅羯囉泥八戶摩戶摩

九摩呵迦流尼迦十沙呵十一

善男子乃至若有衆生欲入大海採諸珍寶
或復心欲入於地下阿脩羅宮或復欲得服

定年藥或復被禁牢獄繫閉或恩愛別離或
有怨憎交會而不能離若在火難若在水難
若刀杖難若蠱毒難若被呪咀言說若被師
子虎狼之難若被蟒蛇蝮蝎之難若被盜賊
或被幻惑之難或被一切恐怖之難若有衆
生杻械枷鎖禁繫之難若被縣官所錄若被
刑流將斷命根或有長病困篤著牀疫病所
逼恐怖畏死若乏衣食卧具湯藥資財之物
彼等衆生於後夜間黃白出時香湯澡浴著
淨衣裳頂禮虛空孕菩薩胡跪合掌以面向

東隨力隨分所辦供具供彼菩薩爲諸衆生
發慈悲心口唱是言虛空孕具大慈悲爲諸
衆生常作利益念我念我以慈悲心願觀我
心願解脫我如前所說之難應說偈言

我之無福相 願與我功德 我今貧賤苦

今應與我願 虛空孕菩薩 是我歸依處

如於此世中 未來與我樂

爾時虛空孕菩薩摩訶薩聞彼衆生音聲之
辭或復現本菩薩之身乃至或現童男童女
身在於彼前慰喻彼言護諸怖難所有恐怖

皆悉除滅乃至略說有諸貧窮孤露衆生或
無資財活命之者觀彼心意令滿彼願乃至
所須一切施與善男子若有王子欲得灌頂
之位欲得稱職彼諸王子應當供養彼大菩
薩稱其名號隨力隨分供養彼虛空孕菩薩
乃至如是等欲得婆羅門位欲得大富長者
位欲得大居士位欲學諸技術欲證內法欲
得呪術欲學工巧欲聞一頌欲望解脫彼諸
衆生聞是虛空孕名字於後夜間黃白現時
以香湯澡浴著淨衣裳以面向東胡跪合掌

頂禮虛空孕菩薩歸依彼已合掌勸請作如是言虛空孕具大慈悲我既薄福與我福相滿我心願應當說於如是偈言

我心所求者 勿令乏少耳 願發憐愍心 慈悲稱我願

第二

十三

爾時虛空孕菩薩以淨天耳過於人耳聞彼衆生此音聲已爲彼衆生或現自身在衆生前觀察衆生心心所行隨堪可與如是如是爲彼衆生示現方便善男子是虛空孕菩薩得如是方便功能具足八大智海此虛空孕

菩薩摩訶薩有如是等不思議事善男子若復有人於四大海水滴滴數之能知多少此虛空孕菩薩摩訶薩善巧勝智方便教化諸衆生等現作方便不可數知善男子假使有人十方虛空可現不可現處可知邊際多少此虛空孕菩薩摩訶薩善巧方便教化衆生不可得知邊際之數爲諸衆生作巧方便變化自身而爲顯現或作佛身而化衆生或作婆羅門身教化衆生乃至隨所應現種種身相得受化者即現彼身而不分別應以畜生

身而受化者即現畜生身應以地獄身而受化者即現地獄身有諸衆生在於現前化身顯現有諸衆生應以睡寤現身益者於睡寤中即爲現身有諸衆生臨至命終唯有細識欲滅衆罪令斷惡道欲將善道爲彼衆生化種種身是諸衆生康存之日歸依何天應見彼天即得安樂者乃至應將善處即現彼天令其歡欣善男子是故此虛空孕菩薩無人能知教化身數邊際之量善男子是虛空孕菩薩得如是等不可思議方便勝智功能具

足殊妙之法此虛空孕菩薩摩訶薩已入諸佛功德之海善男子是故虛空孕菩薩摩訶薩頭戴顯現摩尼應寶爾時一切大衆在會中者從佛所聞讚歎虛空孕菩薩已於虛空孕菩薩即生希有殊特之心生極尊重恭敬之心皆悉合掌瞻仰而住持種種香華末香塗香旛蓋寶幢雜色衣服雜寶瓔珞歌詠讚歎種種音樂供養虛空孕菩薩時虛空孕菩薩摩訶薩持前供具供養世尊奉世尊已在世尊前長跪合掌而白佛言世尊云何於此

五濁之世被大黑闇無明所覆諸衆生內能
作佛事佛言善男子譬如虛空不縛不解無
見無迷而虛空體本性清淨而虛空內因風
動現塵霧烟雲故名虛空爲不淨耳因水雨
故離彼塵等諸障礙法即得顯現日月星宿
便知刻漏羅婆時節晝夜長短半月滿月年
歲度數如是如是善男子如來一切諸法真
如隨於虛空心之本相本性清淨但諸衆生
以客塵煩惱心意成濁爲彼等故如來以慈
悲等法門雨慈悲雨被煩惱所濁諸衆生輩

即得清淨無有諸垢而彼衆生心得清淨即
見佛日出現於世得智光明潤已於不思議
諸佛功德之內自得曉了建立彼於勝四念
處及聖道中乃至建立十八不共法大慈大
悲真實法中是故有諸阿羅漢辟支佛等諸
菩薩輩出現於世善男子於汝意云何虛空
之性能住於眼不答言不也世尊佛言眼能
住於識不答言不也世尊佛言眼住觸不答
言不也世尊佛言眼內因觸所生三種之受
於是之中虛空住不答言不也世尊佛言略

說乃至耳鼻舌身亦復應當作如是觀善男子於汝意云何意住空界不答言不也世尊乃至意中虛空住不因是法中諸佛如來應正遍知出現於世不答言不也世尊佛言善男子諸衆生等依住虛空不答言不也世尊佛言善男子於意云何虛空之性依衆生住不佛作是語已虛空孕菩薩摩訶薩白佛言世尊各各不相倚住於自境界各不相侵世尊一切諸法無有境界空故無染一如實際一如如應作是知世尊譬如虛空不可破

壞不可分別不作分別不動無物無芽無子無果無名無字無思無念如是如是世尊一切法相如是知已菩薩摩訶薩於一切法中得無生忍爾時世尊而說呪曰

多地他^一縛婆何囉闍^二未奴叉夜^三祇那闍耶^四闍那膩莫^五牟尼呵囉^六阿那也^七破羅漂頗^八伽羅婆膩莫^九阿你捺也^十阿婆舍舍婆^{十一}舍那舍莫^{十二}那舍多多^{十三}迦囉莫舍莫^{十四}吉唎摩妬毗沙莫^{十五}支多那也^{十六}雞梨奢都^{十七}三舒沙膩^{十八}莎呵^{十九}

佛言善哉善哉善男子汝能於如是眼降伏
勝師子安詳步水頻呻吼陀羅尼爲諸衆生
命終之時最後出息命欲過時能滅煩惱障
業障報障滅是障已令生清淨刹中善男子
汝能行無量無邊諸佛世界爲諸衆生起慈

第二

十六

悲心至於村落城邑府省縣官宮殿及諸國
土至是處已現種種形種種威儀說大乘經
典教化衆生於刹利惡行乃至沙門惡行所
斷於種種不善之法安置一切諸善法中爾
時世尊說是法時於大衆中無量無邊諸天

世人得種種三昧陀羅尼諸忍或復有得十
地法中真實智慧十千人等於無生法中得
無生忍若有衆生執著虛空是有爲者得此
燈光明已有爲施根皆悉斷滅無爲施行速
現成就佛說經已於大衆中諸比丘等及天
龍夜叉乾闥婆阿脩羅迦樓羅緊那羅摩睺
羅伽梵釋護世四大天王聞佛所說此妙經
典一切皆悉歡喜奉行

虛空孕菩薩經卷下